



STINAPA TA INFORMA

E 'PROFESHONAL'

E nòmber di kariño di Nestor Janga ta 'Pro'. Esei ta un abreviashon di 'profeshonal', un título ku e ta karga bon meresí. Ku su 55 aña e no t'esun mas hóben mas i bo por imaginá bo ku el a hasi hopi kaba den su bida. Nasí na Boneiru el a yega di traha na Hotèl Bonaire i Flamingo Beach, pero tambe na SSV komo "security". Fuera di esei e konosé Bestuurskantoor mihó ku tur hende. Na 1990 Pro a bai Hulanda pa 3 aña, siguió pa un estadia di 3 aña tambe na St. Maarten i Saba. Eina el a siña konosé e poder fenomenal di naturalesa den forma di un berdadero orkan "Lucia". E no ta kasá mas pero e tin dos yu muhé grandi di 25 i 19 aña, i un mas chikí di 11 aña na Saba. For di 6 di aprel 1998 Pro ta trahando komo "Ranger" na Parke Nashonal Washington Slagbaai. Un di su trabounan prinsipal tabata di duna informashon na e bishitantenan, pero despues a bin aserka e trabou di mantenshon di terenonan i edifisyonan. Ora ku puntr'é pa e diferensha entre awe i ántes, e ta konta i splika, mustrando riba un bòrchi grandi: "Antes tabata traha kaminda tabatin mester. Awendia tin un planifikashon pa hinter e aña. Wak, eina tin LR2 i SR2, esei kemen "Long Route" i "Short Route". Eina mester kap rama. Ora bo mira AVP, kemen nos mester yena buraku den kaminda. Awor aki tur hende sa delantá kiko mester hasi. Tambe riba base regular nos ta pasa kontrolá hinter e trunké. Pasobra ainda tin hende ku ta kòrta e wayanan. Mi no por komprondé esei pasobra e ta tene e kabritunan sin doño pafó, i esei ta bon. Anyway, afortunadamente mi gusta kana. Den mi tempu liber tambe mi sa train kana di mi kas pa Dos Pos. Esei ta tenemi den kondishon. Asina mi por keda traha hopi tempu pa STINAPA. I esei ta bon, pasobra nan ta un bon doño di trabou. Akinan mi ke keda te dia mi baha ku penshun. "Por ta t'esei ta tené den bon kondishon, pero tambe nan ta bira grandi den su famia. E mes ta biba den kas ku tabata di su tanta; Sany Anthony. Esei tambe a bira hopi bieu. Tabata falta un luna pa e yega 100! Sany tabata kome kasi tur kos di su mes kurá. Por ehèmpel kònkòmber ku galiña fresku òf kabritu. Yòrki òf 'corned beef' ku batata òf pampuna. "Awendia bo ta haña e pianan di galiña gigan-tesko pero segun mi e kosnan ei ta kan-kan di hòrmona" E ta hari. "Nò, ántes e galiñanan ku tabata kana liber tabatin pia mas chikitu, pero nan tabatin mihó smak. I e trunkilidat di bida di Rincon tambe ta laga bo biba largu." "Pro, kiko lo bo hasi si bo tabata Gezaghbeber pa un solo dia?" Nos ta puntr'é. E ta pensa un ratu promé ku e kontestá: "Wèl, lo mi perkurá pa e leinan ta ser kontrolá bon. Ta prohibí pa tira piská, pero tòg e sa pasa ainda. Mi ta spera ku mi lo biba pa wak ku e poblashon di piská lo ta bon atrobe, te ku por tira piská na un manera regulá atrobe. Protekshon di Turtuga i karkó tambe ta un bon kos. Mi por kunsumí hopi ora nos ta gara hende ku karkó asina chikitu ku nan ta pas den bo plant'i man. Laga e pober karkó yega edat adulto no? E ora ei ta yega un dia ku nos por kome nan de bes en kuando atrobe i nos yunan tambe por gosa di nan. Skirbí pa Marcel Nahr.

Pa mas informashon i reakshon: STINAPA, telefon 717 - 8444, info@stinapa.org

NOS TA BIBA DI NATURELESA



Traha huntu na un desaroyo duradero pa Boneiru